

DOW ta basha abou chollerhouse Emanstraat 100 y 102



ORANJESTAD(AAN):DOW a tuma un decision di basha abou e cas den Emanstraat. Ta un cas cu tin dos percela na dje. Tin Emanstraat 100 y 102 registra riba e adres aki. Ta un cas di hopi aña caminda tabata tin un famia ta biba aden. Cu tempo e cas a cuminsa deteriora y famia grandi tambe a bay for di e cas. Despues algun hende a huur esaki pero su condicion a pone cu algo mester a wordo

haci. E cas tabata afgekeurd pa biba aden. Casi henter famia tabata di acuerdo cu e condicion di e cas. Asina a cuminsa busca manera di haci algo. Tabata tin interes pa bende y esun cu cumple lo deshaci di e cas. Mientrastanto añanan a pasa y e cas a bira mas bien un choller house. Hopi biaha bomberonan a sali pa paga candela cu tabata un menaza pa e area. Tambe por a mira cu famia

a yega di sera e cas pa evita entrada pero esaki tampoco a yuda. E peliger tabata grandi cu presencia di e cas cu na diferente ocasion Serlimar tambe a haci limpieza aden y pafó. Chollernan tabata usa e cas como nan dump tambe pa tira sushi di negoshinan den vecindario. Mientras cu practicamente casi henter famia kier bende y basha e cas abou, tabata tin un solo miembro cu tabata opone y no

kier a bende y tampoco basha e cas abou. Pesey mes pa añanan e molester tabata tey danki na e unico miembro di famia aki fam H. Finalmente un decision mester a wordo tuma y esaki ta DOW mes a tume. DOW tin un responsabilidad pa atende cu casonan asina pasobra e cas tabata un peliger serio pa e area. Un ora pa otro e por a cay den otro tambe y causa daño sea na cualkier choller drumi eyden of otronan pasando den e area. Pesey DOW a dicidi di basha e cas abou aunke un miembro di famia tabata bringa esaki. E cas ta den asina mal condicion cu den un ora e tabata full basha abou y

mas bien a bay over na lanta e restonan di construccion y benta esaki afo. E trabou mes gobierno lo paga cu ta un suma di 14 mil florin pero e cuenta aki lo wordo pasa pa e famia. Kiermen gobierno lo cobra e herederonan e suma di 14 mil florin. DOW a busca diferente oferta y esaki ta esun cu nan a haya. For di un miembro di famia mes por a compronde cu nan lo paga gobierno e cuenta. Mientrastanto a keda solamente e tereno habri cu ta na benta y por wordo usa pa cualkier proyecto cu ta pas tambe den renovacion di centro di ciudad.